

魏時，水積羅布北岸，是當時孔雀河水亦必徑向東行，余上文已論及矣。然則自晉宋以後，河流之情形若何？爲吾人所研究之問題也。考漢書所云：羅布入海之口，僅爲一河。西域傳云：

『其河有兩源：一出葱嶺，一出于闐。于闐在南山下，其河北流，與葱嶺河合，東注蒲昌海。』

據此是和闐河會塔里木河東流入海。海都河與車爾成河雖未述及，疑亦與葱嶺河會流東逝也。及水經注所述，則分南北兩河入海。其叙北河云：

『北河，自疎勒逕流南河之北。北河又東……逕樓蘭城南而東注。河水又東注於勃澤，即經所謂蒲昌海也。水積鄯善之東北龍城之西南。』

又述南河云：『河出葱嶺自歧沙谷分流。南河又東與于闐河合，又東，右會阿耨達大水，會流東逝，通爲注賓河，注賓河又東逕鄯善國北，治伊循城，故樓蘭之地也。其水東注澤，澤在樓蘭國北（治）。扞泥城，其俗謂之東故城。』又引釋氏西域記曰：『南河自于闐東於北三千里至鄯善入牢蘭海者也。』並上節水經注卷二。

綜合酈道元所述，顯示塔里木盆地有二大河東流入羅布淖爾：一爲北河，一爲南河。北河則稱：『逕樓蘭城南，東注於勃澤，即經所謂蒲昌海。』南河則稱：『逕流鄯善國北，東注澤。』叙南河所入之海，則曰：『蒲昌海。』『水積鄯善之東北，龍城之西南。』叙北河所入之海，則曰：『牢蘭海』『澤在樓蘭國北。』其所稱之蒲昌海與牢蘭海，是否同爲一海，或爲兩海因地而異名，道元均未加以詮釋。但如道元所述，羅布淖爾所受水，確係二道入海：一在北，即樓蘭城南；一在南，即鄯善國北。其情形甚爲顯然。酈道元爲北魏時人，所據材料必爲當時之著述。如釋氏西域記，余亦疑爲晉、宋間作品；則所論之羅布淖爾情形，必爲道元當時之情形無疑。由是言之，是羅布淖爾自東晉以後至北魏之末（公元三三〇—五二八年），水分兩道入海：南道之海在樓蘭東故城之北，即在今密遠縣北；北道之海在龍城西南，若南北同注一海也。則北魏時之海水較漢時已南徙。北岸始於赫定樓蘭遺址之東南，南岸伸張於密遠之北矣。其形勢當亦爲南北縱長也。附圖二